

四明叢書

張宗祥



學士門人

丞相蔑兒吉觶先生脫脫

也先帖木兒

合傳

脫脫字大用蔑兒吉觶氏馬札兒台之長子也生而岐嶷異于常兒及就學請于其師浦江吳直方曰使脫脫終日危坐讀書不若日記古人嘉言善行服之終身耳稍長膂力過人年十五爲皇太子怯憐口怯薛官天曆元年襲授成製提舉司達魯花赤累進御史大夫授金紫光祿大夫時伯父伯顏爲中書右丞相既誅唐其勢

益無所忌擅爵人赦死罪任邪佞殺無辜諸衛精兵收
爲己用府庫錢帛聽其出納帝積不能平先生常憂其
敗私請于其父曰伯父驕縱已甚萬一天子震怒則吾
族亦矣曷若于未敗圖之其父以爲然復懷疑未決質
之其師其師曰傳有大義滅親大夫但知忠于國家
耳餘復何顧焉及伯顏擅貶宣讓威順二王帝不勝其
忿決意逐之事定詔知樞密院事至正元年命爲中書
右丞相錄軍國重事詔天下悉更伯顏舊政復科舉取
士法又開經筵遴選儒臣以勸講而先生實領經筵事

中外翕然稱爲賢相三年詔修遼金宋三史命先生爲都總裁官又請修至正條格頒天下時有疾漸羸上表辭位有旨封鄭王食邑安豐賞賚巨萬俱辭不受乃賜松江田爲立稻田提領所以斂之七年別兒怯不花爲右丞相以宿憾譖其父詔徙甘肅先生力請俱行復移西域撒思之地至河召還甘州就養而薨八年命先生爲太傅九年復爲中書右丞相恩怨無不報河決白茅堤又決金堤方數千里民被其患五年不能塞先生用賈魯計請塞之以身任其事築決堤成天子嘉其功賜

世襲荅刺罕之號仍賜淮安路爲其食邑已而汝穎之閒妖寇聚眾反以紅巾爲號襄樊唐鄧皆起而應之十一年奏以弟御史大夫也先帖木兒爲知樞密院事將諸衛兵十餘萬討之克上蔡旣而駐兵沙河軍中夜驚也先帖木兒盡棄軍資器械北奔汴梁收散卒屯朱仙鎮朝廷以也先帖木兒不習兵事詔別將代之也先帖木兒仍爲御史大夫十二年紅巾有號芝麻李者據徐州先生請自行討之城破賊遁去十四年張士誠據高郵詔先生總制諸王諸省軍討之西域西番皆發兵

來助師次濟寧遣官詣闕里祀孔子過鄒縣祀孟子十
一月至高郵連戰皆捷俄以哈麻之譖有詔罪其老師
費財削其官爵安置淮安也先帖木兒奪御史臺印出
都門外聽旨初命先生安置淮安俄有旨移置亦集乃
路十五年三月臺臣猶以謫輕列疏其兄弟之罪于是
詔流先生于大理宣慰司鎮西路流也先帖木兒于四
川礪門九月遣官移置阿輕乞之地十二月己未哈麻
矯詔遣使鳩之死年四十二先生儀狀雄偉頎然出于
千百人中而器宏識遠莫測其蘊功設社稷而不伐位

極人臣而不驕輕貨財遠聲色好賢禮士皆出于天性
事君之際始終不失臣節惟惑于羣小急復私讎君子
譏焉二十三年監察御史張冲等上章雪其冤詔復官

爵元

史

宋史道學傳序

道學之名古無是也三代盛時天子以是道爲政教大
臣百官有司以是道爲職業黨庠術序師弟子以是道
爲講習四方百姓日用是道而不知是故盈覆載之間
無一民一物不被是道之澤以遂其性于斯時也道學

之名何自而立哉文王周公既沒孔子有德無位既不
能使是道之用漸被斯世退而與其徒定禮樂明憲章
刪詩書修春秋讚易象討論墳典期使三五聖人之道
昭明于無窮故曰夫子賢于堯舜遠矣孔子沒曾子獨
得其傳傳之子思以及孟子孟子沒而無傳兩漢而下
儒者之論大道察焉而弗精語焉而弗詳異端邪說起
而乘之幾至大壞千有餘載至宋中葉周敦頤出于春
陵乃得聖賢不傳之學作太極圖說通書推明陰陽五
行之理命于天而性論人者瞭若指掌張載作西銘又

極言理一分殊之指然後道之大原出于天者灼然而無疑焉仁宗明道初年程顥及弟頤寔生及長受業周氏已乃擴大其所聞表章大學中庸二篇與語孟並行于是上至帝王傳心之奧下至初學入德之門融會貫通無復餘蘊迄宋南渡新安朱熹得程氏正傳其學加親切焉大抵以格物致知爲先明善誠身爲要凡詩書六藝之文與夫孔孟之遺言顛錯于秦火支離于漢儒幽沈于魏晉六朝者至是皆煥然而大明秩然各得其所此宋儒之學所以度越諸子而上接孟氏者歟其于

世代之污隆氣化之榮悴有所關係也甚大道學盛于
宋宋弗究于用甚至有厲禁焉後之時君世主欲復天
德王道之治必來此取法矣邵雍高明英悟程氏實推
重之舊史列之隱逸未當今置張載後張栻之學亦出
程氏既見朱熹相與博約又大進焉其他程朱門人考
其源委各以類從作道學傳

趙氏家學

趙先生嗣元

趙先生嗣興

合傳

趙先生古經合傳

趙嗣元字長卿嗣興宇時進皆文叔若恢之子能繼其志長卿與邑耆舊杜清叟葛天民交稱三君子時進有經濟才而深自韜晦其子古經因指文叔所植古柏爲號曰友柏以明志蓋終元世無仕者

東陽縣志

隱君家學

黃先生迪

黃迪隱君景昌之孫也淵穎嘗授之學

吳淵穎集

淵穎門人

鄭先生銘

鄭銘字景彝浦江人世以孝義聞先生面目嚴毅不妄言笑從大父大和司家政察其爲人可成遠大器聘鄉先生吳淵穎爲之師淵穎授以春秋三傳之學有所質問咸中肯綮金華胡翰亦從淵穎先生與之晝夜相摩切大肆其力于古文辭事母至孝年六十二卒

宋文憲文集

梓材謹案潛溪爲吳先生碑言先生卒諸生胡邦翰鄭銘等來相治後事胡邦翰蓋卽胡翰也

提舉戴九靈先生良

博士鄭先生濤

並詳北山四先生學案

鄭先生深

鄭深字仲幾一字浚常浦江人幼知讀書務了大義不能泥章句然負氣不羈稍長氣益振游學京師聞太師脫脫喜士卽走見之太師與語大悅謂其子哈刺章曰鄭先生有道之士也爾往事之先生教以書詩得師道甚太師稱譽弗置口聞于上初皇太子鞠育大師家與哈刺章同臥起至是有旨使之其學皇太子至先生以孝經進錫錦衣一襲明年太師以煩言出居西寧以哈刺章託先生又明年太師還朝開太傅府奏先生爲長

史遷宣文閣授經郎轉鑾書博士侍經帷教胄子者四載改中書吏部員外郎太師以讒去先生曰天下自此多故矣遂移病弗視事已而除僉江南浙西道肅政廉訪司事時中原道不通浮海而還尋除僉江東建康道肅政廉訪司事未及上卒年四十八先生沈敏多智數秉心慈恕而壹以正裁之頗以師道自任授經宣文閣中皆勳戚大臣之子先生戴星而出戴星而入孜孜以開物成務日迪導之與人交不以勢之崇庠而貳其心豫章揭傒斯瀏陽歐陽玄東明李好文臨川危素尤與

爲文墨交而無閒宋景濂長先生四歲負笈游吳立夫

門始與之交其卒也爲之誌其墓

宋文憲集

鄭先生濂

鄭濂字仲德浦江人大和之孫與弟湜俱以義聞洪武初召見慰諭甚至問以治家長久之道先生以謹守家

法對深見嘉獎

姓譜

雲濂謹案宋潛溪跋先生詩後云仲德生之歲與余同其名與余同少而從學於吳貞文公又與余同又云余中歲自金華徙居青蘿山中又與之同里梓材謹案金華府志稱其主家政二十年子孫從化洪武十四年命除福建布政司參政

黃先生迪

見上隱君家學

陳先生士貞

曾祖文煥

陳士貞字彥正浦江人曾祖文煥通春秋穀梁學官登仕郎宋亡杜門著書有春秋質疑傳學者先生自幼記誦日數千言長從鄉先生吳深裏遊習春秋以龔家學鄧巴西聞其學行與同列薦諸朝授處州石門書院山長再長建德之釣臺衢之柯山二書院遷富州儒學教授趣裝上道卒于婺城之寓舍先生于書多所玩繹晚尤以存心養性爲務扁所居齋曰儼若思

戴九靈集

陳先生大倫

陳大倫字彥理諸暨人初學易旣而更春秋敷繹義例
揮豪輒雲煙滿紙屢試場屋不能中繩尺于是棄絕益
攻古文詞浦陽吳淵穎萊以奧學雄文名當代先生從
之講學下及秦漢以來諸文章大家章有法句有旨青
鐙夜懸達旦不寐學大進遠近交聘爲家塾師元季兵
亂避入流子里當兩山夾澗作晚香樓三楹閒與賓客
暢飲爲樂酒酣提筆咏詩脫帽高歌擊几案爲節或支
筇行古石細路閒游目思視意若與之相忘髮已斑白